

宋史新編卷二十七

明南京戶部主事兼管維繫編

禮二

封禪太宗立之八年泰山父老詣闕請東封帝厚賜遣之明年復請宰臣宋琪等三上表請乃允隨以宮殿災罷真宗大中祥符元年兗州父老及諸道貢士詣闕請宰臣王旦等率内外文武官吏蕃夷僧道父老二萬餘人五表請乃允詔十月封泰山是月帝蔬食止樂以二十四日辛亥行事遣使詣岳州采三脊茅以玉爲玉牒聯以金繩緘以玉匱置石礧中正坐配坐用玉冊六其

匱纏以金繩封以金泥印以受命寶又用金鑄寶曰天
下同文以封璽際玉冊文曰嗣天子臣某敢昭告于昊
天上帝臣嗣膺景命昭事上穹昔太祖揖讓開基太宗
憂勤致治廓清寰宇混一車書固抑升中以延積慶元
符錫祚衆寶效祥異域咸懷豐年屢應虔修封祀祈福
黎元謹以玉帛犧牲粢盛庶品備茲禋燎式薦至誠皇
伯考太祖皇帝皇考太宗皇帝配神作主尚享玉牒文
見本紀明日壬子禪祭皇地祇于社首山玉冊文曰嗣
天子臣某敢昭告于皇地祇無私垂祐有宋肇基命惟
天啓慶賴坤儀太祖神武威靈太宗聖文德綏九

王臣恭膺寶命纂承不緒穹昊降祥靈符下付景祥延
鴻祕文昭著八表以寧五兵不試九穀豐穰百姓親比
方輿所資涼德是愧溥率同詞縉紳協議因以時巡亦
旣肆類躬陳典禮祗事厚載致孝祖宗潔誠嚴配以伸
大報聿脩明祀本支百世黎元受祉謹以玉帛犧牲粢
盛庶品備茲禋瘞式薦至誠皇伯考太祖皇帝皇考太
宗皇帝配神作主尚饗畢事大赦天下改乾封縣曰奉
符縣帝往還四十七日未嘗遇雨雪嚴冬之候景氣恬
和祥應紛委政和中臣民屢請東封蔡京當國將講封
禪以文太平預具金繩玉檢及他物甚備造舟四千艘

雨具亦十萬計迄不能行

汾陰后土真宗東封又明年以羣臣請詔許四年春祀
汾陰后土乃以二月辛酉行事玉冊文曰嗣天子臣某
敢昭告于后土地祇恭惟位配穹昊化敷品彙瞻言分
壤是宅景靈備禮親祠抑惟令典肇啓皇宋混一方輿
祖禰紹隆承平茲久眇躬纘嗣勵翼靡遑厚德資生綿
區允穆清寧享祐戴履蒙休申錫寶符震以珍物虔遵
時邁已建天封明察禮均有所未答櫛沐祇事用致其
恭夷夏駿奔瑄牲以薦肅然郊上對越坤元式祈年豐
思聖政本兆民樂育百福蕃茲介祉無疆敢忘祇畏恭

以幣犧牲粢盛庶品備茲瘞禮皇伯考太祖皇帝皇
考太宗皇帝侑神作主尚享諸儀大略如東封

太清宮大中祥符六年亳州父老等三千三百人詣闕
請朝謁太清宮群臣表請從之七年正月二十一日朝
謁奉上太上老君混元上德皇帝加號冊寶玉匱金繩
如封禪儀初大中祥符元年正月乙丑帝謂輔臣曰朕
去年十一月二十七日夜將半方就寢忽室中光曜見
神人星冠絳衣告曰來月三日宜於正殿建黃籙道場
一月將降天書大中祥符三篇朕竦然起對已復無見
命筆識之自十二月朔卽齋戒於朝元殿建道場以佇

神貺適皇城司奏左承天門屋南角有黃帛曳鴟尾上帛長二丈許緘物如書卷纏以青縷三道封處有字隱隱蓋神人所謂天降書也王旦等皆再拜稱賀帝卽步至承天門瞻望再拜遣二內臣升屋奉之下旦跪奉而進帝再拜受之親奉安輿導至道場帛上有文曰趙受命興於宋付於昚居其器守於正世七百九九定緘書甚密挾以利刀方起其書黃字三幅詞類書洪範老子道德經始言帝能以至孝至道紹世次諭以清淨簡儉終述世祚延求之意讀訖帝復跪奉蘊以所緘帛盛以金匱丙寅群臣入賀賜宴帝與輔臣皆蔬食遣官祭告

宗廟社稷及京城祠廟遂改元四月辛卯朔
降內中功德閣六月八日封祀制置使王欽若奏天
書降泰山林木上授中使捧詣闕帝趣召輔臣曰朕五
月丙子夜復夢鄉耆神人言未敢宣露今果與夢協其
文曰汝崇孝奉育民廣福錫爾嘉瑞黎庶咸知祕守斯
言善解吾意國祚延永壽歷遐歲封禪日皆奉以升壇
置正位之東自是凡舉大禮皆如之天禧元年正月詔
以十五日行宣讀天書之禮有司設次天安殿中位玉
皇像置錄本天書於東聖祖板位于西建金籙道場三
晝夜其日三鼓帝詣道場焚香再拜西向立百官朝服

針殿攝中書令任中正跪奏嗣天子臣某謹與宰臣等
宣讀天書講求聖意虔思睿訓撫育生民攝太尉向敏
中宣讀每句已卽詳繹其旨言上天訓諭之意攝中書
令王欽若錄之宣讀畢攝侍中張旻跪奏嗣天子臣某
敢不虔遵天命又取功德閣天書泰山天書宣讀如上
儀帝自作欽承寶訓述以示中外先是帝於大中祥符
五年十月語輔臣曰朕夢降神人傳玉皇之命云先令
汝祖趙玄朗授汝天書令再見汝如唐朝恭奉玄元聖
帝翌日復夢神人傳天尊言吾坐西斜設六位以候是
日卽於延恩殿設道場五鼓一籌先聞異香頃之黃光

滿殿蔽燈燭覩靈仙儀衛天尊至朕再拜殿下俄黃霧
起須臾霧散由西陛升見侍從在東陛天尊就坐有六
人揖天尊而後坐朕欲拜六人天尊止令揖命朕前曰
吾人皇九人中一人也是趙之始祖再降乃軒轅皇帝
凡世所知少典之子非也母感電夢天人生於壽丘後
唐時奉玉帝命七月一日下降總治下方主趙氏之族
今已百年皇帝善爲撫育蒼生無怠前志卽離坐乘雲
而去王旦等皆再拜稱賀卽命參知政事丁謂等與禮
官脩崇奉儀注閏十月制九天司命保生天尊號曰聖
祖上靈高道九天司命保生天尊大帝聖祖母號曰元

天大聖后七年九月卽滋福殿設玉皇像八年正月朔
詣玉清昭應宮奉表奏告上玉皇大帝聖號曰太上開
天執符御曆含真體道玉皇大天帝奉刻玉天書安寶
符閣以帝御容侍立于側天禧元年正月朔上玉皇聖
號寶冊二日詣景靈宮上聖祖天尊大帝徽號寶冊三
月王旦等詣兗州太極觀奉冊上聖祖母懿號徽宗政
和六年九月朔詣玉清和陽宮奉玉冊玉寶上玉帝尊
號曰太上開天執符御曆含真體道昊天玉皇上帝明
年五月又上地祇徽號曰承天效法厚德光大后土皇
地祇徽宗崇尚道教制郊祀大禮以方士百人執威儀

引分列壇下政和三年冬至祀園丘太師蔡京奏天神降格實爲大慶乞付史館帝出手詔播告天下製天真示現記尋以天神降日爲天應節卽其地建迎真宮明年夏至躬祀方丘又製神應記略云羽衛多士奉輦武夫與陪祝官顧瞻中天有形有像若人若鬼持矛執戟列於空際見者駭愕又先時用方士魏漢津之說鑄鼎九於中太一宮南爲殿奉安之復於帝鼐之宮立大角鼎星祠旣又奉安九鼎於九成宮事具五行志六年用方士王仔昔議定鼎閣於天章閣徙九鼎奉安之八年復用方士言鑄神霄九鼎奉安於上清寶籙宮

至聖文宣王廟太祖因周之舊增脩塑先聖亞聖十哲像畫七十二賢先儒二十一人像于東西廡木壁親製先聖亞聖贊餘命文臣爲之其春秋二丁及仲冬上丁貢舉人謁先聖先師命官釋奠皆如舊典廟門立戟十六枝用一品之禮冕服九旒非如唐開元用王者袞冕也皇帝幸國子監則謁廟真宗東封幸曲阜謁孔廟酌獻服韡袍廟內外設黃麾仗有司定儀肅揖帝特展拜親製贊刻之石孔林樹擁道帝降輿乘馬設奠於墓再拜追謚玄聖文宣王詳見孔宣傳明年詔封十哲爲公七十二弟子爲侯先儒爲伯或謚宣親製玄聖文宣王

顏子以下宰臣分贊後改至聖避國諱也釋奠以祭酒司業博士充三獻後以三公行事大中祥符三年以判監孫奭請備差太尉太常光祿卿充三獻又頒釋奠儀注并祭器圖於諸路仁宗詔釋奠用登歌謁廟特再拜自是有再拜禮熙寧中封孟軻鄒國公議者請與顏子並配禮官言孟子於孔門當在顏子之列宜塑像配食至於荀況揚雄韓愈皆發明先聖之道有益學者宜繪像加封爵以世次先後從祀從之荀況等並封伯崇寧初以王安石配享列孟軻之次已而辟雍文宣王殿以大成為名改用冕十二旒服九章執圭立戟並

如王者之制大觀元年以大司成強淵言令每歲貢士始入辟雍竝以元日行釋菜禮二年禮局言史記弟子傳曰受業身通六藝者七十有七人家語曰七十二弟子皆升堂入室按唐會要七十七人開元禮止七十二人去取不一本朝議臣斷以七十二子之說取琴張等五人去公夏首等十人今以家語史記參定焉政和三年封王安石舒王子雱臨川伯從祀五年詔鄒縣孟子廟以樂正子配享公孫丑以下從祀皆擬定甘露靖康初詔安石降從祀紹興十三年臨安太學成高宗臨幸作先聖及七十二弟子贊冠以序文御書揭殿廡後又

石監中以碑本徧賜郡學孝宗幸學去王雱書
幸學詔以周敦頤張載程顥程頤朱熹從祀黜王安
石先是熹封國公及是敦頤載顥頤竝封伯製道統十
三贊賜國子監宣示諸生景定中皇太子詣學從其請
以張栻呂祖謙從祀竝封伯咸淳三年詔封曾參郈國
公孔伋沂國公配享封顥孫師陳國公升十哲復以邵
雍司馬光列從祀其序充公顏回郈公會參沂公孔伋
鄒公孟軻居正位之東面西向北上爲配位費公閔損
薛公冉雍黎公端木賜衛公仲由魏公卜商居殿上東
面西向北上鄆公冉耕齊公宰予徐公冉求吳公言偃

陳公顓孫師居殿上西面東向北上爲從祀東廡金鄉
侯澹臺滅明任城侯原憲汝陽侯南宮适萊蕪侯曾點
須昌侯商瞿平輿侯漆雕開睢陽侯司馬耕平陰侯有
若東阿侯巫馬施陽穀侯顏辛上蔡侯曹卬枝江侯公
孫龍馮翊侯秦祖雷澤侯顏高上邽侯壤駟赤成邑侯
厝作蜀鉅平侯公夏首膠東侯后處濟陽侯奚容點富
陽侯顏祖洛陽侯句井疆鄆城侯秦商卽墨侯公祖句
皐武城侯縣成沂源侯燕伋宛句侯顏之僕建成侯樂
欽堂邑侯顏何林慮侯狄墨鄆城侯孔忠徐城侯公西
華侯施之常華亭侯秦非文登侯申振濟陰侯顏

噲泗水侯孔鯉蘭陵伯荀况睢陵伯穀梁赤萊蕪伯高
堂生樂壽伯毛萇彭城伯劉向中牟伯鄭衆緱氏伯杜
子春良鄉伯盧植滎陽伯服虔司空王肅司徒杜預昌
黎伯韓愈河南伯程顥新安伯邵雍溫國公司馬光華
陽伯張栻凡五十二人竝西向西廡單父侯宓不齊高
密侯公治長北海侯公皙哀曲阜侯顏無繇共城侯高
柴壽張侯公伯寮益都侯樊須鉅野侯公西赤千乘侯
梁鱣臨沂侯冉孺沐陽侯伯虔諸城侯冉季濮陽侯漆
雕哆高苑侯漆雕徒父鄒平侯商澤當陽侯任不齊牟
平侯公良孺新息侯秦冉梁父侯公肩定聊城侯鄒單